

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होरें आखेआ ऐ जे भारत दुनिया दी सब्बने शा तेज रफतार कन्नै बरोस करने आली अर्थबवस्था बनी गेदा ऐ ते अज्ज अपने विकास लेई हर मुख्य भारत कन्नै जुड़ना चांहदा ऐ।
- मुख्यमंत्री उमर अब्दुल्ला होरें आखेआ ऐ जे नौकरिएं च आरक्षण बारे कमेटी इस बवस्था दा पूरा पराता जायजा लैग तां जे हर कुसै लेई न्यांह गी जकीनी बनाया जाई सकै।
- प्रधानमंत्री नरेन्द्र मोदी होर कल “मन की बात” कार्यक्रम च अपने बचार देश विदेश च रवा’रदे श्रोताएं कन्नै सांझे करगंन।
- बैडमिंटन च भारत दे चिराग शेट्टी ते सात्विक साईराज रंकीरेड्डी मर्द दे डबल्स मकाबले दे सेमीफाइनल च पुज्जी गे न।

<><><><><><>

PM India

प्रधानमंत्री नरेन्द्र मोदी होरें आखेआ ऐ जे अज्ज भारत दुनिया दी सारे शा तेजी कन्नै बधदी बड़्डी अर्थबवस्था ऐ ते दुनिया दा हर मुख्य विकास लेई भारत कन्नै साझेदारी करना चांहदा ऐ। जर्मनी दे स्टगार्ट च मीडिया हाउस आस्सेआ आयोजित इक कार्यक्रम च वीडियो कांफ्रेंसिंग राएं संबोधत करदे होई उनें आखेआ जे अज्ज हर कोई भारत दी सामरिक महत्ता गी समझा करदा ऐ। “भारत—जर्मनी सतत विकास लेई इक खाका” विषय पर आयोजित इस कार्यक्रम च मोदी होरें आखेआ जे पिछले 10एं ब’रें च उंदी सरकार आस्सेआ लागू कीते जा’रदे रिफार्म, परफार्म ते ट्रांसफार्म आले मूलमंत्र दे कारण भारत उप्पर दुनिया दा भरोसा बी बधेआ ऐ। उनें आखेआ जे भारत नै हर क्षेत्र च नमियां नीतियां आदियां न ते अपने आपै गी 21मीं सदी च तेजिया कन्नै विकास दी रफतार फगड़ने लेई तैआर कीता ऐ। मोदी होरें आखेआ ऐ जे 2047 तगर भारत गी इक विकसित मुख्य बनाने लेई इक मजबूत मुंड पाई दित्ता गेदा ऐ, जेह्दे उप्पर विकसित भारत दी विशाल इमारत दा निर्माण कीता जाग। उनें आखेआ जे भारत दी विकास यात्रा च जर्मनी इक भरोसेमंद भ्याल ऐ।

<><><><><><>

CM Quata

मुख्यमंत्री उमर अब्दुल्ला होरें आखेआ ऐ जे सरकारी नौकरिएं च आरक्षण आले मुद्दे गी लेइयै मंत्रिमंडल दी इक सब कमेटी कायम कीती गई ऐ जेहड़ी सब्बने धड़ें कन्नै गल्लबात करोग। एह कमेटी समग्रता आला दृष्टिकोण अपनाग तां जे सब्बने कन्नै न्याह होए ते कुसै दे बी अधिकार खुस्से नेई जान। कल श्रीनगर च लग्गे दे इक प्रोग्राम च पत्रकारें कन्नै गल्लबात करदे होई अब्दुल्ला होरें आखेआ.....

एह ध्यानजोग ऐ जे कल कैबिनेट दी बैठक दरान आरक्षण नीति दी नजरसानी करने दा फैसला लैता गेआ ऐ।

<><><><><><>

CM Rabta

मुख्यमंत्री उमर अब्दुल्ला होरें कल श्रीनगर च अपने “राबता” दफ्तर दा उद्घाटन कीता जेहदा मकसद पारदर्शी, जनता केन्द्रित ते जवाबदेह प्रशासन गी जकीनी बनाने दी इक पक्की बवस्था ऐ। इक्कै थाहर सब्बै सुविधा उपलब्ध कराने दे मकसद कन्नै शुरू कीते गेदे इस दफ्तर दा मकसद डेटा आधारित निगरानी ते रणनीतिक संचार दी मदद कन्नै लोकें दिएं दिक्कतें शकैतें ते मंगें गी सुनना ते उंदा बनकदा नबेड़ा करना जकीनी बनाना ऐ।

<><><><><><>

JMC QR Code

जम्मू मुनिसिपल कारपोरेशन जेएमसी नै घरें थमां कूड़े-कचरे दे प्रबंधन सरबंधी शुल्क गी किट्ठा करने आले कम्में गी सोक्खा बनाने लेई एंड्रायड क्यूआर आधारित प्वाइंट ऑफ सेल पीओएस पैहलकदमी दी शुरूआत कीती ऐ। एहदे कन्नै बसनीक मोबाइल ऐप, वालेट कन्नै यूपीआई राएं डिजीटल अदायगी करी सकदे न। जेएमसी नै इक सोशल मीडिया पोस्ट च आखेआ जे एह पैहलकदमी कूड़े कचरे सरबंधी प्रबंधन सरिस्ते गी आधुनिक बनाने ते लैनदेन सरबंधी प्रणाली गी पारदर्शी करने लेई इक महत्वै आली गैह ऐ। पीओएस सरिस्ता बक्ख-बक्ख गेड़ें च लागू कीता जाग, एहदी शुरूआत पैहले ताले गेदे वार्डें च कीती जाग ते फही इसी पूरे शैहरा च लागू कीता जाग।

<><><><><><>

SI Posts

जम्मू कश्मीर सेवा चयन बोर्ड जेकेएसएसबी नै जम्मू कश्मीर पुलिस मैहकमे च 669 सब इंस्पैक्टरें दी भर्ती लेई अधिसूचना जारी करी दिक्ती ऐ।

मेदवार 3 दिसम्बर 2024 थमां ऑनलाइन इरखास्तां जमा कराई सकदे न। दरखास्त जमा कराने दी खीरी तरीक 2 जनवरी 2025 ऐ। लिखित मतेयान दी तरीक दी घोषणा मगरा कीती जाग।

<><><><><><>

CBSE

केन्द्रीय माध्यमिक शिक्षा बोर्ड नै परिवार दी इक्कली इक्कली बेटी लेई योग्यता वजीफा स्कीम लेई पात्र विद्यार्थिएं थमां ऑनलाइन दरखास्तां मंगियां न। एह स्कीम इक्कली उनें कुड़िएं लेई ऐ जिनें सीबीएसई थमां 2024 च 10मीं पास कीती दी ऐ ते सीबीएसई कन्नै जुड़े दे स्कूल च 11मीं क्लास च पढ़ा करदी होए। एहदे कन्नै 2023 ब'रे आले सिंगल गर्ल चाइल्ड वजीफें गी नमें सिरैया कराने लेई बी ऑनलाइन दरखास्तां मंगियां गेइयां न। ऑनलाइन दरखास्तां जमां कराने दी खीरी तरीक अगले महीने दी 23 तरीक रखी गेदी ऐ। मते ब्योरे लेई मेदवार सीबीएसई दी वैबसाइट दिक्खी सकदे न।

<><><><><><>

PM-Man Ki Baat

प्रधानमंत्री नरेन्द्र मोदी होर कल आकाशवाणी पर “मन की बात” कार्यक्रम राएं देश ते विदेश दे लोकें कन्नै अपने बचार सांझे करगंन। एह इस महीने रेडियो कार्यक्रम दी 116मीं किशत होग। एह कार्यक्रम आकाशवाणी ते दूरदर्शन दे समूलचे नेटवर्क उप्पर ए.आईआर दी वैबसाइट उप्पर ते न्यूज़ ऑन एयर मोबाइल ऐप उप्पर प्रसारत कीता जाग। एहदे इलावा एयर न्यूज़, डीडी न्यूज़, पीएमओ ते सूचना ते प्रसारण मंत्रालय दे यूट्यूब चैनलें उप्पर बी सिद्धा प्रसारण कीता जाग। आकाशवाणी दे इस कार्यक्रम गी हिंदी प्रसारण दे तुरत मगरा क्षेत्रीय भाषाएं च बी प्रसारत कीता जाग। बडलै 11 बजे होने आले मन की बात दे हिंदी प्रसारण दे तुरत मगरा एहदा डोगरी च अनुवाद प्रसारत रातीं 8 बजे बी कीता जाग। आकाशवाणी दा क्षेत्रीय समाचार एकांश जम्मू “मन की बात” पर इक परिचर्चा कल रातीं सांझे 10 बजे करोग।

<><><><><><>

Div.Com

जम्मू दे डिवीजनल कमीशनर रमेश कुमार होरें कल डोडा जिले दे गंदोह सब डिवीजन च कलगूनी भलेसा थाहर सेवा भारती दे दिव्य कन्या छात्रावास दा उद्घाटन कीता। आईआरसीटीसी ते जम्मू कश्मीर बैंक दे समाज दे प्रति जिम्मेवारी आली सीएसआर पैहल तैह्त बनाए गेदे इस होस्टन दा मकसद बेसहारा, गरीब ते समाज दे दबोए लतड़ोए दे पिछड़े वर्गें दिएं बच्चिएं लेई रौहने दी बवस्था करना ऐ जेड़ियां कुसै कारण अपनी पढ़ाई पूरी नेई करी सकदियां ते स्कूल छोड़ी दिंदिया न।

इस मौके डिवीजनल कमीशनर होरें दूर दरेड़े ते पिछड़े दे इलाकें दिएं बच्चिएं लेई इस चाल्ली दे होस्टलें दे महत्व गी उजागर कीता, जिनेंगी पढ़ाई करने लेई घरा बाहर रौहने लेई कोई बवस्था नेई होंदी। डोडा थमां विधायक दलीप परिहार, जिला विकास कमीशनर हरविंदर सिंह ते होर केई अधिकारी इस मौके मजूद हे।

<><><><><><>

PSA

किश्तवाड़ जिला पुलसै नै मुदस्सर अहमद नां दे इक नशातस्कर खलाफ मामला दर्ज करियै उसी कोट भलवाल जेलै च भेजी दित्ता ऐ। आकाशवाणी दे जिला संवाददाता कैलाश नाथ नै एसएसपी किश्तवाड़ जावेद इकबाल मीर हुंदे हवाले कन्नै खबर दित्ती ऐ जे एह आदमी जिले च नोजवानें गी नशा उपलब्ध कराने दा मुख्ख आरोपी हा ते पैहले बी ऐसे केई मामले च ओह मुलव्वज रेह् दा ऐ। एसएसपी होरें मकामी लोकें अगगे अपील कीती ऐ जे नशाखोरी, नशे दी खरीद-फरोख्त बारे कोई बी जानकारी थोने पर ओह इनें नंबरें पर फोन करियै इतलाह देन तां जे नशे दी कबैतु गी भलेया खत्म कीता जाई सकै। जानकारी देने लेई नंबर न- 9906154100 ते 9103454100

<><><><><><>

IFFI

भारत दे 55में अंतर्राष्ट्री फिल्म महोत्सव च अज्जै दा ध्याड़ा बी मता खास रौहग कीजे अज्ज बी केई सारे कार्यक्रमें दा आयोजन करोआया जा करदा ऐ जेह्ड़े खरी मती गिनतरी च दर्शकें गी अपनी बक्खी आकर्षित करडन। कल 70 शा मती फिल्में दे प्रीमियर दी बड़ी मती कामयाबी दे परैन्त अज्ज बी 70 फिल्मां दस्से जाने दा कार्यक्रम ऐ। एह्दे अलावा ओपन-एयर स्क्रीनिंग दे इक हिस्से दे तौर उप्पर अज्ज त्रै होर फिल्मां बी दस्सियां जाडन। ऊआं अज्जै दा सब्बनें शा बड़डा ते खास कार्यक्रम 'क्रीयेटिव माईड्स ऑफ टूमारो' आयोजन होग जित्थे इक नमीं फिल्म तैयार करने दी 48एं घैंटें दी चुनौती खत्म होग। इस ब'रे होआ करदे इस मुकाबले लेई फिल्म तैयार करने दिएं 13 बक्ख-बक्ख विधाएं आहले खेत्तर थमां 100 काबल नौजवानें गी चुनेआ गेदा ऐ।

<><><><><><>

Badminton

चाइना मास्टर्स बैडमिंटन टूर्नामेंट दे मर्दे दे डब्ल्स सेमीफाइनल च भारत दी शीर्ष जोड़ी चिराग शेट्टी ते सात्विक साईराज रंकीरेड्डी हुंदा मुकाबला अज्ज दक्खन कोरियाई जोड़ी जिन योंग ते सियो सेउंग जे कन्नै होग। चीन दे शेन्जेन च खेड्ढे जा करदे इस टूर्नामेंट दे क्वार्टरफाइनल च भारती जोड़ी नै कल डेनमार्क दे किम एस्ट्रप ते एंडर्स स्कार्प रासमुसेन दी जोड़ी गी 21–16, 21–19 कन्नै हराया। उआं लक्ष्य सेन डेनमार्क सिंगल क्वार्टर फाइनल मकाबले च 18–21, 15–21 कन्नै हारी गेआ।

<><><><><><>